

बाजी बधैया सवरे सवरे,
लली कीरति ने जाई सवरे सवरे ॥

गोपीहू नाचै गवालाहू नाचै
सब कौउ नाचै सवरे सवरे, लली कीरति..।

नंद जू नाचै जसोदा जू नाचै
कीरति जू देखे सवरे सवरे, लली कीरति..।

गैया हू नाचै बछराहू नाचै
तैलरा हू नाचै सवरे सवरे, लली कीरति..।

भानु बाबा हू नाचन लागै
हंसति जसोदा सवरे सवरे, लली कीरति..।

पंलगा में नंद लाल पौढ़े
किलकत नाचै सवरे सवरे, लली कीरति..।।

-----O-----

सुन्दर भानुराय की बेटी ॥

नंदराय को ढोटा मोहन, भुज भरि तासों भेटी
कोटि कामशर मूर्छित हरि की बाधा साधा मेटी
वश करि पिय चेटी सी करिके विहरति कुंजन लेटी
बांध्यो लट लटकन ते नागर, बंधन कटि की फेंटी।

दधि माधुरी

दोहा-श्रीराधा पद पद्म रस पगी रसीली भूमि,
प्रणवों श्रीवृषभानुपुर लता लूम रही झूमि।
गहवर वन अरु सांकरी गलियन लीला होय,
तब ही अनुभव होत जब भाव सरस हिय पोय ॥

रसिया

रघोर सांकरी की गलियन में,

मांगौ दाज दही को श्याम ॥

इतते आई भानुदुलारी, सखी सहेली संग में भारी

शीश दधि माखन दूध अपार

बड़ी तन पै जोबन को भार

सजी सोहैं सोरह शृंगार

दोहा-ताहू पै गहनान ते लदी भई ब्रजनार,
प्रेम भार हू ते भरीं तनीं चलीं ज्यों धार।
कानन झनक सुनी अनवट बिछुवन पायल अभिराम ॥
सुनतइ आये दान विहारी

टोल सखन कौ लैंकें भारी

तिलक गलछप्पा मुख पै धार
फूल पत्ता ते कर सिंगार
कान में कुण्डल झुब्बादार
दोहा-बेरन की गुंजान की फल-फूलन की माल
रंग बिरंगी धातु तन सोहैं गेरु लाल
लकुट हाथ लै हेला दैके रोकीं ब्रज की बाम।।
हेला ते न रुकीं ब्रजनारी

गवारन कूँ चली दैके गारी
पड़े आड़े जब श्रीनन्दलाल
मोह गई सबरी ब्रज की बाल
न जाने कहा बखेरयो जाल
दोहा-टाड़ी है रहीं तगी सी आगे श्रीब्रजचन्द
रूप अनुपम देखती हंस बोले नन्दनन्द।
तुम बारन सौं दान मांगवौ यही हमारौ काम।।
इतनी सुनत हंसी ब्रजनारी

इत में मुसके दान बिहारी
कही सुन नंद बाबा के लाला
सुन्यौ तेरे घर कौ बड़ी हवाल
मांगनो सीख्यौ उल्टी चाल

दोहा-ब्रजराजा कौ लाड़िलौ मांगमांग के खाय,
दूध दही के कारनं चोरी करवे जाय।
इन बातन ने लाला तेरी सब निकारैं नाम।।
इक तौ ब्रज में चोर कहायौ

विधि नें कारौ रंग बनायौ
कौन तोय बेटी देगौ ब्याह
बने तुम डोलौ लैके चाह
भरे मन में ब्याहन कौ उछाह

दोहा-काजर बैदा तिलक ते सजे धजे तैयार,
दान अनेकन कौ धरे मन में भारौ भार।
ऐसे ते कहा प्यास बुझै चाहे मांग फिरौ सब गाम।।
कृष्ण कहैं सुन भोरी-भारी

मोमें औगुन तनक न प्यारी
रही तू क्यों इतनी इतराय
नेक से दधि पै हू गरवाय
रूप तेरी मोकूं रह्यौ भाय

दोहा-मेरो रंग है सोहनों चन्दा हू लजियाय,
तुम्हरी ही अँखियन कौ खोट रह्यौ दरसाय।

श्याम रंग की छाप लगे जब और रंग बेकाम ।।
सब बातन को तोर यही है

सुन ते मेरी बात सही है

बड़े राजा हैं श्री वृषभान
करैं जाचक कौ वे सनमान

आस पुरवैं वेई जिजमान

दोहा-बड़े घरन की लाड़िली रही तिहार साथ,
मेरे दान मान की लज्जा उनके हाथ ।
दाता बड़ी उदार गुनीली श्रीराधा रस भाम ।।
नाम सुन्यो वृषभानु कुलारी

खिल रही जैसे चन्द उज्यारी

सखिन कौ हुक्म दियौ इक साथ

दूध दधि सौंपो इनके हाथ

दीनता इनकी हमरे साथ

दोहा-मेरे बाबा नृपति की फिर दुहाई नित,
बरसाने नहिं राखिहीं जाचक कोई दूचित ।
यही आस ते पर्यो बड़ो प्यारो बरसानों धाम ।।

-----O-----

तेरे मल में कहा बरी है, मेरो मारण रोव्यो आय ।

न कोऊ और पास ह्यां सी
धिरी में इकली मतवारी

मधुर मुसक्यावै गिरिधारी

रिर ऊपर मटकी दधि की मैं निकरूँ कैसे हाय ।

हमारो दान देओ प्यारी

यहाँ की रीति यही न्यारी

चतुर तुम हो बिछुवा वारी

बहुत दिना में आज हमारे हाथ परी मन भाय ।

साँवरे जोरूँ तेरे हाथ

अकेली और न कोऊ साथ

ऊजरी ना होवैगो साथ

या ब्रज के सब हैं उत्पाती लाज हमारी जाय ।

लाज ते कहा सरैगो काम

दान दधि को दै मांगे श्याम

होय यहाँ दाता ही कौ नाम

इतनी सूम बनें मत गौरी दान देत छबराय ।

बनाओ बात बहुत तुम लाल
पिटे तुम मैया ते हो काल
न छूटै इतने हूँ-पै जाल
मात-पिता गोरे तुम कारे, कुल को रहे लजाय।

पिता माता को देति हवाल
डरै ना नेकहु अपनौ ख्याल
बजावै सी क्यों इतनों गाल
आज लेऊँगो दान यहीं क्यों आँखें रही दिखाय।

चली ग्वालिन बच कै कतराय
पकर लई मोहन नें झट जाय
छुड़ाई बांह सखी इठलाय
झटका पटकी मटकी फूटी दही चल्याो ढरकाय।

गली यह धन्य साँकरी खोर
भिले ग्वालिनको श्याम किशोर
चली गहवर को लै चित्तचोर
धन्य धन्य ब्रजधाम जहाँ ऐसी आनन्द दरसाय।

-----O-----

दधि लूट लियो दगरे में, कुंजल ते तनक परे में॥
आय रही दधि बेच वृन्दावन साँझ भई दिन दुर रह्यो रे,
जमुना नीर तीर बन मारग मेरे मन रस धुर रह्यो रे,
इकली देख मोय बीच बनी के झपट लियो गहरे में।
छोड़दे कान्हा बेर भये घर सास देय मोय गारी रे,
तानों दै दै जायगी ननादिया रार करैगी भारी रे,
सबरी सखी चबाव करैगी हंसी होय सगरे में।
अरी गुजरी बहुत दिना ते तू मेरे मन बस रही सी,
वा दिन बच गई बात बनायके चाल बहुत तू जानै सी,
वा दिन लूटयो मो मन हँसके नखरेई नखरे में।
कंचन मोल दही है मेरो कहा गवारिया खावैगो,
कंचन मटकी ऐंड़इ कंचन कैसे कोई लेवैगो,
सेत मेंत में कंचन चाहै झगरेई झगरे में।
कैसे सेत मेंत में चाहूँ दान लऊँ सब मेरो है,
ब्रज में मैं ब्रजरज कहाऊँ कहा नाय तू जाने है,
बीच डगर में ग्वालिन लुट गई संकरेई संकरे में॥

-----O-----

अनोखी छेला ठाढ़ो मांरो दही को दाब ।।

दधि मटकी ते निकसी घर ते
आय मिल्यो जानें वह कित ते
देखन लग्यो एक टक टक ते
लकुटिया है दियो आड़ो मारग रोक्यो आन ।
इत उत देखूँ कोइ न पावै
लाज लोक की मोय डरपावै
भीतर ते जियरा सकुचावै
पर्यो मोपे यह गाढ़ो कौन देय ह्यां कान ।

झटका पटकी करन लग्यो वह
फूटी मटकी दही चल्यो वह
मीठे बोल सुनावै कह कह
दही तैकें मुख माड्यो मैंने न राख्यो मान ।
आय पर्यो वह मेरे गोहन
अपनो मुख यह लाग्यो पोंछन
अंचरा छोरन साड़ी कोरन
प्रेम कौ सागर बाढ्यो ऐसी भई पहचान ।

बरसाने चारी दैला दाब, बड़ो प्यासो रसिया ।।

गोरो मुख घुंघट में चमकै
तेरे झुमके झूमैं कान, बड़ो प्यासो रसिया ।
माथे बेंदी चम-चम चमकै
लटके गालन आन, बड़ो प्यासो रसिया ।
नथवारी के मोती चमकै
तेरे रच रहे होठन पान, बड़ो प्यासो रसिया ।
नैनन कजरा नोक नुकीली
ये मारै बान कमान, बड़ो प्यासो रसिया ।
चाल चलत लंहगा सैंकारै
चोली की गजब उठान, बड़ो प्यासो रसिया ।
कमर कोंधनी रुनझुन बाजै
बिछुवा भर रहे तान, बड़ो प्यासो रसिया ।
फहरावै फरिया और फुंदना
लटकत लगै महान, बड़ो प्यासो रसिया ।
रूप तेरो उड़-उड़ के खावै
तेरी घायल करै मुसकान, बड़ो प्यासो रसिया ।

ब्रज की सब गोरिन में तेरी

अजब निराली शान, बड़ो प्यासो रसिया।

ऐसी ना चाहिए मुख मेरी

मेरी कर जोरे की मान, बड़ो प्यासो रसिया।।

-----O-----

मोय दैला दीध कौ दाब गुजरिया बरसावे वारी।।

या मारग ते नित ही निकसौ, भरी गरुर गुमान।

दान दही कौ आज लेऊँगो, तुम सब रस की खान।

ठाले डोलौ तुम क्यों लाला, मेटौ कुल की कान।

मैं तो ब्रज कौ चन्द्र छबीलौ, ठाले कैसे जान।

बिना दान के जान न दूँगो, ये ही मेरी आन।

सुनके मुसक्यार्ह वह ग्वालिन, हरि कौ राख्यो मान।

अपने हाथन दह्यो खवायो, कर लीनी पहचान।

बहुविधि दान दियो चित्तचोरहि, दीयो नागर पान।

गली सांकरी रस में डूबी, कोयल गावै गान।।

-----O-----

कण्ठ तोर ला पतौआ तोये प्याय दँऊली दही।।

यों मत रोके मोहन प्यारे

निकसैंगी हम साझा सकारे

देख हँसेगे ये गैलहारे

मेरे प्यारे मोहन मेरी मान तो सही।

बहुत पुरानी मेरी दोहनी

घुट-घुट के अब भई चीकनी

रंग रंगी ये बड़ी मोहनी

फूटैंगी ये छाड़ दै मेरी बैया जो गही।

चढ़े कदम पै कुँवर कन्हैया

भाज चली वह छुम्क छैया

साफ निकर गयी चतुर लुगैया

चोरी करूँ आज मैं तेरे हरि ने खीज कही।

दूर गई वह देखत श्यामहि

गुंठा मार रही नंदलालहि

उंगरी चाट-चाट दिखरावहि

उड़ गई मैना देखत देखत मन की मनहि रही।

मीठी तेरी छाछ पिवाय दै प्यारी मज भरके ।

कहा जार के दही जमायो
मीठो बहुत भयो मन भायो
मैंने लीयो चाँख, पिवाय दै प्यारी...।

तू मीठी तेरो मनुआ मीठो
दूध दही माखन सब मीठो
सांघ कहूँ मैं साख, पिवाय दै प्यारी...।

बहुत दिना कौ रसिया प्यासो
भागन ते तू मिली कहाँ सों
काहे चुरावै आँख, पिवाय दै प्यारी...।

मन भाई सी टहल कराय लै
मुरली सुनलै नाच नचाय लै
मेरे मन की राख, पिवाय दै प्यारी...।

तेरी लऊँ बलैया गवालिन
बिक जाऊँ मैं तेरी गारिन
धीरे ते कुछ भाख, पिवाय दै प्यारी...।

-----O-----

आओ आओ रे सखा, धेरो धेरो रे सखा,

दही लैकें गवालिन जाय रही ।।

बरसाने की सांकरी गलियन
जाय रही ब्रजनारी झुण्डन
चलो चलो रे सखा, आओ आओ रे सखा,

सब गोपी चलीं न जांय कहीं ।

दूध दही के मांट भरे हैं
माखन अपने सीस धरे हैं
मैंने जानी रे सखा, पहचानी रे सखा,
सौँधी ही सुगंध है आय रही ।

झांझर झनक सुने है कानन
बिछुवन की भई घोर झनाझन
दौरो दौरो रे सखा, गली रोकौ रे सखा,
गये सांकरी गली दही वारी रोकही ।

गीतन की हू घोर सुनी है
ऐसी मानो लाल मुनी है
देखो देखो रे सखा, धाओ धाओ रे सखा,
आड़े भये सबन की गैल गही ।।

आयो मोहब हमारे, वो तो कर गयो काम करारे ॥

हौले हौले घर में आयो
 में भोरी सी जान न पायो
 पीछे ते मेरी आँख बीच के गालन मूँठा मारे।
 में बोली तू नंद को लाला
 हम भोरी हैं ब्रज की बाला
 झिक के माखन दूंगी तोकूं पीछे ते हट जा रे।
 जब वह मेरे सामई आयो
 दौना भर माखन धरवायो
 हौले-हौले सब गटकायो मोपे जुलम गुजारे ॥

-----O-----

माखन दैदै तबक गुजरिया, अपनी मटकी तबक उतार

कौन गाँव की रहवे वारी
 नई नवेली बिछुवा वारी
 कैसी डोल रही मतवारी
 चाल चलै झोंके ते प्यारी लम्बो घूँघट मार।

हम ते मत मांगै तू माखन
 पीछे आय रही तै मांटन
 देंगी माखन तोकूं चाखन
 सास ननद भारी झगरेंगी मोकूं होत अवार।

तेरेई मैं लूंगो माखन
 तू मीठी मदवारी ग्वालिन
 दै-दै तै अपने ही हाथन
 श्याम नाम मैं बंशी वारो कर तै मोते प्यार।

मत रोकै तू गैल हमारो
 भारी माट बोझ है भारो
 कहा बिगरेगो श्याम तिहारो

चरचा होय गाँम में हमकूं है जाय देश-निकार।

लई उतार श्याम नें मटकी
 मांखन खायो खबर न तन की
 गप्पा मार रह्यो लोनी की
 जान न पायो श्याम फेंट ते बंशी लई निकार ॥

-----O-----

काण्डा मेरे माखन खायदे आवैगो कि नांय ॥

दऊंगी माखन की सदलोनी,
मिसरी भोग लगावैगो कि नाय।
कदम की डारन झूला डारयो,
संग-संग मोय झुलावैगो कि नाय।
मेरी बगिया में फूल खिले हैं,
फूलन तोर गुंथावैगो कि नाय।
हरे-हरे गोबर अंगना लिपायो,
संग-संग मोय नचावैगो कि नाय।
ऊंची अटरिया पै पचरंग पलका,
मेरी अटरिया पै जावैगो कि नाय ॥

-----O-----

कोई मोते लै लेओ री गोपाला ॥

दधि को नाम न लेवै गवालिन, टेरत मदन गोपाला।
जिनको नाम श्याम सुन्दर है, है यशुदा के लाला।
वृन्दावन की कुंज गालिन में, नटखट नैन विशाला।
बनी बावरी कुंज गालिन में, ढूँढ़त ब्रज हरि गाला ॥

छोड़ दे गैल हमारी काहे को ठानी तैले रार ॥

भयो नंद को तू उतपाती तैंने चरार्ह गायं
घर-घर करै खखोरा चोरा चोरी माखन खाय
मान जा बात हमारी, काहे को ठानी..।

देस हमारो गैल हमारी हम ब्रज के सिरताज
हमरी हो तुम सब ब्रजनारी दान लेँगो आज
खोल दे मटकी प्यारी, काहे को ठानी..।

सबरो ब्रज वृषभान बबा को जाकी बसते छांह
बांह पकर के नंद बसाये याते रोकै राह
यही है रीति तुम्हारी, काहे को ठानी..।

देश भानु को लली भानु की भानु हमारे माथ
दयो दहेज सबै कछु जा दिन पीरे कीये हाथ
भई तुम सब घर वारी, काहे को ठानी..।

कैसी बात बनावै छलिया हम ना भोरी भारी
चोरन के कहूं ब्याह होत हैं को दे बेटी प्यारी
बाप (नंद) की बात बिगारी, काहे को ठानी..।

मटकी फोरुं हरवा तोरुं जो ना देंगी दान
नाचूं गाऊं तोय रिझाऊं जो राखेगी मान
रही तू बड़ी गमारी, काहे को तानी..।
आप गमार गमार गवारिया दधि के लूटनहार
पहले नाचो गाओ हमकूं रिझवो कृष्णमुरार
मान रखेंगी भारी, काहे को तानी..।
फेंटा कस नांचे गिरिधारी बंशी मधुर बजाय
रीझ गई सद माखन लोनी हाथन रहीं खवाय
जुरी गिरिधर सों यारी, काहे को तानी..।।

-----O-----

आजा आजा नंदलाल दही मीठो।।

ऐसो मीठो कबहु न खायो, लडुआहु है गयो सीठो
बरसाने को सब कुछ मीठो, दूध दही माखन मीठो
धै भागन ते मिलै नंद के, करनेों परे बहुत नीठो
ऐसी भई सब ठीठ गोपिका, ऐसोइ तू बन गयो ठीठो
गवाल ऊपर गवाला ठाढ़े, ठाढ़ो तू सब के पीठो
तो यह पायी दही मथनियां, भजचल कहूं न परे दीठो
आय गई तो लौं घरवारी, खाय भजै मारे गूठो।

सांवरिया जाल है काहे मारग रोकै श्याम।।
सजनियां प्याय है दधि, हाथ पसरै श्याम।।
सांवरिया कल फिर आऊंगी
आज तो छोड़ है तेरे हाथन जोरुं श्याम।
सजनियां कल कौन देखी
आज ही प्याय है तेरी हा-हा खावै श्याम।
सांवरिया घूंघट मत खोलै
हंसी होवैगी मेरी ये बुरी बान है श्याम।

सजनियां मुख कैसे देखूं
धार कजरा की बुरी ये घायल है गयो श्याम।
सांवरिया राह छोड़ दही ले
नांय यशुदा सों तोहि पिटवाऊंगी मैं श्याम।
सजनियां मैया ते पिटवैयो
हाथ दोऊ जोरे गोरी तेरे आगे खड़ी है श्याम।।

-----O-----

चली है मटकी लैकें, चली है मटकी लैकें,
अरी दधि बेचल ब्रज की लाम चली है ॥
आगेई मिल्यो गुपाला, संग लिये पांच दस ग्वाला
धेरयो खोर सांकरी धाम, चली है..।
अब दान देओ तुम प्यारी, माखन की मटुकी भारी
मेरो माखन चोरा नाम, चली है..।
नांय सेतमेंत में माखन, ना दूंगी तोकूं चाखन
तालो डोलै तू बेकाम, चली है..।
में नंद महर को वारो, मत समझै मोय गमारा
मेरो नामी है नंदगाम, चली है..।
चल हट क्यों मारग रोकै, लपटा झपटी क्यों टोकै
में ऊंचे घर की वाम, चली है..।
बिन दान लिये ना जाऊं, चाहे गारी सौ-सौ खाऊं
गारी है लै मेरो नाम, चली है..।
कछु नांय गाय नंदलाला, तब दान देय ब्रजबाला
धमकी ते न बनें यह काम, चली है..।
मोहन ने नांय दिखायो, ब्रजबाला सबै रिझायो
तब दधि दान दियो ब्रजवाम, चली है..॥

जा रे जा रे मोहला रे छोड़ गेल तो मेरी।
दैजा दैजा दही वारी दही की गजरी ॥
आयो बड़ो बन उन करके सिंगार,
छैला बन्धो डोलै बड़ो चोर लबार,
हट जा रे बजमारे नांय तेरी चेरी।
ऐसी इतरावै बड़े गोप की सी नार,
तेरी जैसी डोलैं दही वारी हजार,
नेक घुंघटा तो खोल ओं घुंघट वारी।
दही के बहाने घुंघट काहे खोलै,
हट जा हट मोते काहे बोलै,
जाय भैया ते कहूंगी सब बात तेरी।
भैया ते मोकूं पिटवाय लीजो,
दही तो नेक चखाय दीजो,
भई नई पहचान गोरी तेरी मेरी ॥

-----O-----

कैसे मांगो दाल गंदार ढीठ तू सांवरिया।
 कैसी बोले नार गंदार ढीठ तू फूहरिया।
 हरे बांस की पोली बंशी ते कितनों इतरावे
 तोर मरोरुंगी काऊ दिन देखत ही रह जावे
 है बैरिन स्रोत छिनार ये तेरी बांसुरिया।
 बंसी सुनवे कूँ काहे तू दौरी-दौरी आवै
 मन में भावै मूढ़ हिलावे तेरो भेद न पावै
 नांय बंसी स्रोत छिनार अरी सुन गूजरिया।
 चार टका की कामर औढ़ कैसी धोंस जमावै
 वन-वन डोलै गाय चरावै लूट लूट दधि खावै
 ऐसो डोलै ज्यों बटमार तू ठालो सांवरिया।
 तू कामर कौ भेद न जानें मन में बनी सयानी
 तू भी छिपी कामर की खोई बरस रह्यो जब पानी
 अब नखरे करै हजार ओढ़ रंग चुनरिया।
 तू कारो तेरी बंशी कारी कामर कारी-कारी
 चोरी और बरजोरी तेरी सबरी बात है कारी
 कारे हैं तेरे यार लुटेरे बागरिया।

बड़ी मटकको बड़ी चटकको कारे कह-कह बोले
 मन की कारी भेद बड़े तेरी कारी अंखियां खोलै
 चले गलबैन को जार कुंज की जागरिया।।

-----O-----

गोरी बच के चली कहीं कूँ, बजरिया फेर फेर
 कन्हैया दधि बेचल कूँ जाऊँ, रोके मत घेर घेर।।
 बहुत दिना में हाथ परी है
 खिल रही जैसे फूल छरी है
 आज सब दान चुकाऊँ, मटकिया गेर गेर
 कान्हा सास बड़ी लड़हारी
 ननदुल गारी देय हजारी
 देख कहूँ बलम न आवै, है रही देर देर देर।
 गोरी झूठे सबै बहाने
 नैना तेरे हैं मरताने
 छबीली काहे झूठी बात बनावै ढेर ढेर।
 दूर निकस गई तेरी गैयां
 दूँढंगो तू कैसे कन्हैया
 देख बलदाऊ भैया रह्यो तोय टेर टेर टेर।।

श्याम तैले काहे को रार मचाई ।।

इकली घेरी गली सांकरी कैसे करुं मेरी माई ।

ऐसो कोई नाय या ब्रज में

छैद करै ऊपर बादर में

नंद महर को बड़ो लाड़लो अकल गई बौराई

आप सयानी बनें छबीली

मोहि बावरो कहै रसीली

दान देत क्यों सूम बनै सूमन ते परी लराई

कहा बात को दान सांवरिया

रोकी तैंने काहे डगरिया

मोहि बताय गंवार गवारिया वन-वन गाय चराई

लिये जात तुम दधि औ माखन

मटकी खोल मोय दै चाखन

मोय गंवार बतावै ठगो आँखें रही दिखाई

श्याम तिहारो ही सब माखन

कल आऊंगी तोहि चखावन

आज छोड़ दै देर होत है तेरी हा-हा खाई

जो मेरो माखन तो गोरी

अबई खवाय दै बांकी छोरी

दै दियो दान सजन मोहन को अपने हाथ खवाई ।।

-----O-----

दै जाओ तुम दान अरी औ ग्वालिनियां ।

हम ना देंगी दान अरे औ सांवरिया ।।

नित-नित बच-बच चली जात तुम ग्वालिनियां,

आज परी हो हाथ हमारे ग्वालिनियां ।

सुनत रही बटमार बसै ह्यां सांवरिया,

दृष्टि परे तुम आज हमारे सांवरिया ।

दान दिये बिन ना जाओगी ग्वालिनियां,

बड़ी सयानी नार सबै तुम ग्वालिनियां ।

दान दियो ना कबहु हटो तुम सांवरिया,

काहे टानी रार अरे तुम सांवरिया ।

नई नई दधि बेचनहारी ग्वालिनियां,

नयो हमारो दान अरी सुन ग्वालिनियां ।

कैसे लेवन हार अरे सुन सांवरिया,

काहे कौ यह दान अरे सुन सांगरिया।
 दही दूध आभूषण बसन्त गवालिनियां,
 जोवन कौ है भार अरी सुन गवालिनियां।
 टेढ़े तुम और टेढ़े बोलो सांगरिया,
 कारे चोर लबार अरे सुन सांगरिया।
 तुमरे कारे नैन बैन जिय गवालिनियां,
 टेढ़ो कारो मोहि कर दियो गवालिनियां।
 या विधि मांगे दान लियो है सांगरिया,
 बतरस प्रीति कौ दान लियो है सांगरिया।।

-----o-----

दाज में तो नाय दऊंगी औ नंदलाला।
 दाज में तो लै लऊंगो औ दही चारी।।

कितनोईकरतै जतन सांगरिया

पास न आऊंगी, दान में तो नाय दऊंगी।

में तो तोरे गौहन आयो

मटकी लै लऊंगो, दान में तो लै लऊंगो।

बटमारी बरजोरी लूटै

जाय कंस कहूंगी, दान में तो नाय दऊंगी।

धौंस दिखावत कंस ममा की

काऊ दिन मारूंगो, दान में तो लै लऊंगो।

ठगिया बात बनावत ठग सौं

नाय छूवन दऊंगी, दान में तो नाय दऊंगी।

ठगनी फंदा फांसन वारी

ठगो बताय दऊंगो, दान में तो लै लऊंगो।

हम तो सूधी हैं ब्रजनारी

सूधी जाऊंगी, दान में तो नाय दऊंगी।

सूधेपन के साज न तेरे

सूधी बनाय दऊंगो, दान में तो लै लऊंगो।

तीन ठौर ते टेढ़ो रसिया

टेढ़ ना छोड़ूंगी, दान में तो नाय दऊंगी।

मन की टेढ़ी टेढ़ी बोलै

टेढ़ निकारूंगो, दान में तो लै लऊंगो।

बंशी जादू सी जादू में
 मैं ना आऊंगी, दान में तो नाय दऊंगी।
 टोना तेरे चंचल नैना
 टोना देखूंगो, दान में तो लै लऊंगो।
 मुसकावै कछु मूठ चलावै
 मूठ भिटाय दऊंगी, दान में तो नाय दऊंगी।
 चाल चलै कछु मंतर पढ़ कै
 जंतर में पढ़ूंगो, दान में तो लै लऊंगो।
 बसी करन करतो सो डोलै
 बस नाय होऊंगी, दान में तो नाय दऊंगी।
 पीछे पीछे तू डोलैगी
 तोय नचाय दऊंगो, दान में तो लै लऊंगो।
 पक्के गुरु की हूँ मैं चेली
 आँख दिखाय दऊंगी, दान में तो नाय दऊंगी।
 हम तो तेरे तू है मेरी
 आँख भिलाय लऊंगो, दान में तो लै लऊंगो।
 बातन प्रीति जुरी दोउन की
 दह्यो पिवाय दऊंगी, दान में तो दै दऊंगी।।

नाय छोड़े री मेरी कलैयां।
 दान देय तो छोड़ूँ कलैयां।।
 कैसे करुं मैं नार अकेली
 पहले पहले ही आई नवेली
 नाय मानैं री ढीट कन्हैया, नाय छोड़े री..।
 पहलै अपनी मटकी धर दै
 अपने हाथन लौनी दै दै
 तब छोड़ूं मैं तोय लुगैया, दान देय तो..।
 तेरे जोरुं हाथ संवरिया
 पैया परुं मेरी छोड़ डगरिया
 दूखैगी मेरी नरम कलैया, नाय छोड़े री..।
 हा हा खाऊं मैं हूँ तेरी
 लेऊं बलैयां तेरी गोरी
 दैदे दूर गई मेरी गैयां, दान देय तो..।
 दान देत मुसकाई नारी
 हंस हंस दान लियो गिरिधारी
 कैसी प्रीति जुरी है दैया, नाय छोड़े री..।।

मटकी बरसावे में फोरेंगे, नंदलांत के ग्वाल ॥

आठें राधा जनम बधाई
भादों सुदी त्रयोदशी आई
बूढ़ी लीला ब्रज में गार्ह
बन ठन ग्वाला ह्वां आवेंगे संग सजे नंदलाल
सजी धजी सब गोपी आई
चिकसौली की मटकी लाई
माखन दही लिए सब धाई
सखा दान बिन ना जावेंगे, नाचें दै दै ताल
रोकी गोपी स्मिर पै मटकी
कहां चली तुम ठिठकी ठिठकी
तेरे बाबा की ना हटकी
हम लूट-लूट दधि खावेंगे हंस बोले गोपाल
झटका पटकी मटकी फूटी
माखन दूध दही सब लूटी
रस की सरिता सबनें घूटी
ये लीला सब गावेंगे जो कीनी वा काल ॥

समझाय तै अपनों कांठ, दानें मटकी मेरी फोरी ॥

तू जानें याही भोरो भारो
बालक है नादान, या नें मटकी..।
सबरे ब्रज में हल्ला है रह्यो
रानी तू तै मान, या नें मटकी..।
हम तो कान करैं तेरो जायो
अटकै बिन पहचान, या नें मटकी..।
माखन सटकै आँख दिखावे
चोरी की परी बान, या नें मटकी..।
तू जानें याय सीधो साधो
ये सब औगुन की खान, या नें मटकी..।
दही दान के धोखे हमते
मांगे जीवन दान, या नें मटकी..।
नांचे मटकै सैन चलावै
छेड़े वंशी की तान, या नें मटकी..।
गैल चलत खैचै अंचरा
मुख पोंछै पीक औ पान, या नें मटकी..।
गैल गिरारे आड़ो है के

दान की ठानैं ठान, या नें मटकी..।

सबरे ब्रज में पूछ लै मैया

याय जानैं सबै जहान, या नें मटकी..।

मैया यों समझावै सबकुं

धीरज राखो कान, या नें मटकी..।

आवन है तू श्याम सलोने

ऊखल बांधूंगी आन, या नें मटकी..।

-----O-----

कैसे जाहिं कसं जब दधि मांजो,

अंखियल में भर-भर पावती..।

प्यारो वह नंद जू को छैया, कर जोर परे मेरे पैंया

कैसे मुख फेरुं जब आशा सों देखे मोकों मनमानी।

मैं चतुर नार करी चतुराई, घुंघट ते देखत पछताई

कैसे आँख चुराऊं वाते है गई नई-नई पहचानी।

बचके मैं चली किनारो देय, चुनरी पकरी मेरो नाम लेय

कैसे कानन मुंदू कहै मोते जब प्यारी वह दधि दानी।

वह छाय गयो मेरे हियरे, बस रह्यो वो नैनन में मेरे

कैसे रोकूँ जागत सोवत रटती, कृष्ण नाम यह बानी।

भभभो जो बांय देवी दाब, आज तेरी चोरी है जायगी..।

पहले ते कह दऊं मैं गवालिन

आई नई बिरज के गामन

नयो रंग नयो है जेवन

दान देन की रीति मान लै नाय पछतावैगी।

कैसो दान कहाँ को है तू

नारी पराई रोके क्यो तू

कामर करी कारो है तू

मैया ते जाय कहूँ पिटाई तेरी है जायगी।

गोरी मैया ते कह ऐयो

पर तू बिना दान मत जैयो

दान देत तू मत दबैरैयो

मेरे मन में बस गई लाजो बच नांय जावैगी।

बड़ो लाड़लो बड़े महर को

कछु तो सोच नंद राय को

नाम हंसावै जसुदा जू को

टेढ़ी चाल छोड़ है नंद के बात बिगर जायगी।

मटकी लै दधि लागयो खावन
भाज गई लै बंसी गवालिन
टेर कह्यो तब नंद के लालन
आजहि रातें घुसूं घर तेरे जब तू मानेंगी।

-----O-----

दहिया मथ रही रई समरकल,

माखल खाजा सांवरिया।।

सब धौरिन को दूध कढ़ायो औटायो मन करके
जामन दैके दह्यो जमायो सौंधो गाढ़ो करके
सास ननद घर नांय अकेली में ही दह्यो चलाऊं
आजा प्यारे बंसीवारे गाय गाय के बुलाऊं
खीर खांड़ घर कनक कटोरा अपने हाथ खिलाऊं
अंचरा ते तेरी ब्यार करूं और मन कर लाड़ लड़ाऊं
जागत श्याम श्याम टेरूं सोवत तेरे सपने देखूं
कबै सवरो होवै तोकूं लोनी खामत देखूं।

-----O-----

लाल वृषभ-दोहन

गाय छोड़ हरि दुह रहै नाटे, राधा रूप दिवावे हैं।

आये भोरई श्याम खिरक में
राधा मुख देखन की मन में
लिये सखा कछु अपने संग में
कियो बहानो गाय दुहन को घुस बरसाने हैं।

सुन के आये हैं गिरिधारी
चली दुहावन भानुकुमारी
कनक दोहिनी लैके प्यारी
जोवन नयो रूप सोनो नैना मनमाने हैं।

देखत भूल रहे नंदलाला
बिन पी भौंग भये बेहाला
झुक्यो मुकुट गिरि मुरली माला
इकटक नैना लगे प्रिया मुख देख भुलाने हैं।

खबर रही ना कहौं है गैया
वृषभ एक तंह पकर कन्हैया
बांधे पांव नोय कर लैया
अन पंसावत देख दूर ते सखा हंसाने हैं।

सखा एक बोलै सुन प्यारे
जल्दी दुह लै नन्ददुलारे

दोहनी भर दै वंशी वारे
सुनें न कछुक श्याम राधावश प्रीति लुभाने हैं ॥

-----O-----

जसुदा मैया लाल तिहारौ भारौ औगुनगारौ है ॥

जा दिन मैं या ब्रज में आई
गौने की मैं नई लुगाई
वाई दिन ते घात लगाई
रसिया गावै लेय नाम यह बकै उधारौ है ।

इक दिन बहु रूप धर आयो
आन गाँम की मोहि बतायो
याके ढोंगन मन पतियायो
एक सैन को मांग बसरो जुलम गुजारो है ।

बड़े भोर ये गयो हमारे
जान न पाई मैं अधियारे
पति के से हेला तब मारे
गई पास मिल भेटयो मेरो छूँघट टारयो है ।

धार काढ़वे गई खिरक में
जुलम कियो यह अधियारे में
नाट्यो बांध्यो गाय तौर में
शन पंसावत सबरो मूठा भरयो हमारो है ॥

साँझी लीला

फूलवा बीनें राधा प्यारी भोरी रंग रंगीली बाल ॥

गोरे तन पै सारी नीली
फरिया लाल कंचुकी पीली
बोलन मीठी बहुत रसीली
धूम धुमारौ लहंगा धूमै, मतवारी है चाल ।

उत ते आये श्याम बिहारी
रसिया बड़े चतुर बनवारी
अचक देखवे कौतुक भारी
खेल रही जहाँ गोप कुमारी, छिप के बैठे लाल ।

कोउ हुमन की डार नगावै
कोउ रंगीले फूल चुनावै
कोउ गिरे फूलन बिनगावै
पालन के दोना में रख के कोउ बनावै माल ।

बीनत फूल दूर गई संग की
बैठ रही हवां लली भानु की
खिली उजारी चन्द्रवदन की
सम्मुख आय गये मनमोहन, देख मनोहर काल ।

दोनों रूप रंग को झेलें
सैनन ही ते साँझी खेलें
देखन ही में करें किलोतें
अँखियन ही में उरझत जावँ सुरझन के नहि ख्याल।

-----O-----

साँझी खेलें छेल छबीली, राधा श्रीवृषभानु दुलार।।

बैठी सिंह पौर अलबेली
सजी धजी सब सखी सहेली
झोरी फूलन भरी नवेली
आई एक नई सी कोई, श्याम रंग सुकुमार।

देख छकीं सब रूप अनोखो
हाव भाव दिखरावै चोखो
भिलवे लगीं तनक नाय धोखो
आदर दै कें पास बिठारयो, आसन सुन्दर झार।

पूछन लगीं कौन की जाई
कैसे बरसाने में आई
मेरे मन को रही तुभाई
ऐसे पूछ रही जब प्यारी, बोली बचन संभार।

मैं हूँ साँझी चीतन हारी
नन्दगाँव की रहवे वारी
तुमरो नाम सुन्यो मैं प्यारी
खेलूँगी मैं संग तिहारे, जब तुम देंगी प्यार।

दै गलबैया चली लाड़िली
मुसकाई वह चित चाड़िली
रस भीजीं भई प्रेम माड़िली
श्याम सखी जब साँझी चीतै, देखें ब्रज की नार।

सुन्दर सी साँझी चितवायो
सुन्दर मीठे गीत गवायो
सुन्दर व्यंजन भोग लगायो
मन भाई सी करै आरती, तै कैं कंचन थार।

ललिता हाव भाव पहिचान्यो
ये तो नन्दलाल मैं जान्यो
ऐसोई सबकौ मन मान्यो
तारी दै दै हँसी सखी सब, आनंद भयो अपार।

-----O-----

वन विहार

गगन में कौन उड़े, मोहि मोहन देहु बताय ॥
 सुन राधे प्यारी ये हंसा सब पक्षि-न को राय
 लिये हंसिनी नभ में बिहरे मोतिन चुग-चुग खाय
 पंख धौरे ऊजरे ॥१॥ गगन में...
 देखो श्रीवृषभानु नन्दिनी कोयल गुन की खा
 कुह-कुह की बोलन मीठी हर ले सबके प्रान
 बोल सब मोहने ॥२॥ गगन में...
 ये तोता हरियल है दीखै ऐसो घनों मलूक
 चौंच लाल कहु पीरी गरदन तीखी याकी कूक
 देख तन सोहने ॥३॥ गगन में...
 ये है मेरौ प्यारो मोरा बोले घोरा धोर
 रंग-बिरंगी पैंचन वारो नार्यै पंख मरोर
 देख घन घोरे ॥४॥ गगन में...
 श्यामा देखो सारस लम्बी गरदन ऊँची टोंग
 छाड़ै प्रान न सहै वियोगहि मीठी याकी
 प्रीति रंग बौरने ॥५॥ गगन में...

मुरली माधुरी

तेरी बंशी ने कियो कमाल रे, मुरली के बजैया ॥
 चढ़ी विमान मगन भई देवी
 काम जगे ते खुल रही नीवी
 ढीली किंकिणी जाल रे, मुरली के बजैया।
 गैयां छांस चरै नेंकहु ना
 मुरली सुनती सुध-हु रही न
 भूल रहे सब गवाल रे, मुरली के बजैया।
 नदियां थम गई बंशी सुनकै
 पानी चढ़यो श्याम के पग पै
 लाई कमलन माल रे, मुरली के बजैया।
 वृक्ष लदे सबरे फूलन ते
 सींच रहे ब्रज मधु धारा ते
 जंह टाढ़े राधा लाल रे, मुरली के बजैया।
 तोता मोर हंस पक्षी तब
 दरसन कर सुधि भूल गये सब
 फस मुरली के जाल रे, मुरली के बजैया।

बंशी सुन नभ बादर आये
 गरजत ताल देत हैं सुहाये
 बरसैं फूलन माल रे, मुरली के बजैया।
 बछरा दूध नैंक ना पीवें
 मोहड़े दूध घूंट ना लेवें
 दूध भरे हैं गाल रे, मुरली के बजैया।
 वन के पक्षी उड़नों भूले
 लटक रहे ऊपर को झूले
 सब वृक्षन के डाल रे, मुरली के बजैया।
 बंशी सुन हिरनी हैं आई
 घेर रहीं सब कुंवर कन्हारै
 जैसे सब ब्रज बाल रे, मुरली के बजैया।
 शम्भु इन्द्र ब्रह्मा देवी सब
 आई बंशी राग सुनन तब
 समझें ना स्वर चाल रे, मुरली के बजैया।।

-----O-----

बांसुरिया बजाय जा बंसी वारे श्याम।।
 बंशी की धुन कानन में परी
 भूली रह गई खरी-खरी
 सुधा बरसाय जा बंशी वारे श्याम।
 वन की हिरनी भूल रही
 मुरलीधर को निरख रही
 छटा दरसाय जा बंशी वारे श्याम।
 बंशी ने पत्थर पिघलाये
 झरना झरे निशिकमल खिलाये
 जियरा सरसाय जा बंशी वारे श्याम।।

-----O-----

हरि प्यारे की बंसी बजत आवै,
 प्यारी श्री राधा जू नचल आवै।।
 लता पता वृन्दावन मोह्यो
 लहर जमुना की उलटी आवै, प्यारी...।
 हरि जू के कानन कुंडल सोहै
 प्यारी जू की चन्द्रिका चमक आवै, प्यारी...।

हरि जू के गले सोहै वनमाला
प्यारी जू के हार दमक आवै, प्यारी..
हरि जू के चरनन नूपुर सोहै
प्यारी राधा के बिछुवा झनक आवै, प्यारी..
जो गति ताल बजै बंसी में
सो गति ताल चलत आवै, प्यारी..।

-----O-----

बाजी बाजी री बंसुरिया कदमवन।।

ऐसी तो बाजी पार निकस गई
जादू सी है गई बंसुरिया कदमवन।
कसक करेजे ऐसी लागी
बैरिन है गई बंसुरिया कदमवन।
लोट पोट भई घायल ऐसी
नागिन सी है गई बंसुरिया कदमवन।
ऐसो जहर चढ़यो सब तन में
बेसुध सी कर गई बंसुरिया कदमवन।
श्याम गारडू मिले तो उतरै
विष की लहर बंसुरिया कदमवन।।

बंसी तो बाजी आधी रात बिरज में।।
सोये बिरज में लोग, सोई हैं गोपी सब
सोये हैं गवाला सब, सोई हैं गैया सब
सोये हैं बछरा सब, सोये बिरज में।
जागे बिरज में लोग, जागी हैं गोपी सब
जागे हैं गवाला सब, जागी हैं गैया सब
जागे हैं बछरा सब, जागे बिरज में।
मोहे बिरज में लोग, मोही हैं गोपी सब
मोहे हैं गवाला सब, मोही हैं गैया सब
मोहे हैं बछरा सब, मोहे बिरज में।।

-----O-----

सुन-सुन रसिया, मीठी-मीठी बहि बजाओ बंसिया।।

वा दिन बजाई तैंने घर पिछवारे
सुन-सुन रसिया, वाई दिना ते मेरे मन बसिया।
जो मुरली बजाई मोंकू बावरी सी कर दई
सुन-सुन रसिया, मेरी घुंघट लाज सबै नसिया।
आज हू बजाई तैंने, भाजी-भाजी आई
सुन-सुन रसिया, तेरे चरनन मेरो मन बसिया।

बाजू बंद गिरे खुल खुल के
सुन-सुन रसिया नीवी बंधन हू खसिया
वेंन बजाई मोह लई हिरनी
सुन-सुन रसिया तेरेई प्रेम धार धंसिया।

-----O-----

में कैसे आऊं कान्हा पायलिया मेरी बाजो
बंधी में तै नाम बुलावै
सुन सुन मेरो मन ललचावै
में कैसे आऊं कान्हा, आंगन में ननदी गालै
रात अंधेरी सब हैं सोये
में जागूं मोय नींद न आये
में कैसे आऊं कान्हा, पौरी में सास विराजै
पड़ी पड़ी तरफूं ज्यों मछरी
करवट तै तै भई अधमरी
में कैसे आऊं कान्हा, तरसूं में तेरे कालै
बंसी तो बंसी सी है गई
गोपी तो मछरी सी है गई
में आऊं चली कान्हा, मेरो मनुवा घर ते भाजै।

ऐसी वंशी श्याम बजाई, सबके मज में भई समाय।।

मोह गई सुन सुन ब्रज नारी
भूल गई सब कुछ मतवारी
चन्दा की खिल रही उजारी

जो जैसे तैसे उठ दौरी, तन मन में अकुलाय।

कोऊ नें जेवत पति छोड़े
घर के कामन ते मुख मोड़े
लज्जा के सब बन्धन तोड़े
रोके हू न रुकैं ज्यों नदिया सावन में इतराय।

भूल गई काजर और बिंदिया
लहंगा औढ़ पहर लई फरिया
कानन में लटकाई चुरियां
हार कमर में बांध कौंधनी माला सी लटकाय।

गहना मारग में गिर जावैं
चोटी ते फूलन बरसावैं
नैनन ते अँसुआ ढरकावैं
साड़ी और अंगिया के बंधन खुल खुल के फहराय।

देख्यो जाय नन्द के नन्दन
जमुना तट ठाढ़े जग वन्दन
भिट गये सबही के दुख द्वन्दन
खेलन लगीं रासलीला को, नाँचें और नचाय।

-----O-----

सुनाय मुरली कहैया प्यारे,
मधुर मुरली की ताल सुना रे ॥
मैं आई तेरे काज दौरी-दौरी
खिरक में छोड़ गाय बछरा रे।
मैं आई तेरे काज दौरी-दौरी
छोड़ यमुना पै सब सखियां रे।
मैं आई तेरे काज दौरी-दौरी
छोड़ पनघट भरो गगरा रे।
मैं आई तेरे काज दौरी-दौरी
लै बागों ते फूल हरवा रे।
मैं आई तेरे काज दौरी-दौरी
तरस गये डूढ़ते नैना रे ॥

कहे बंशी तू रात बजावै रसिया, बजावै रसिया,
मोहे जैलज नींद न आवै है ॥

जतन जतन कर नींद बुलाऊं

कहे बंशी की फूंक भगावै रसिया, भगावै रसिया,

मोहे नैनन नींद न आवै है।

पलका पड़ी-पड़ी मैं सुन रही

कहे बंशी सुनाय जगावै रसिया, जगावै रसिया,

मोहे नैनन नींद न आवै है।

घर के बाहर के सब सोये

मोपे रह्यो न जाय रसिया, न जाय रसिया,

मोहे नैनन नींद न आवै है।

श्याम प्रेम में भई बांवरी

मेरी घर में रुकै बलाय रसिया, बलाय रसिया,

मोहे नैनन नींद न आवै है ॥

-----O-----

बंसी बाज रही कदमल में कैसे जाऊँ मेरी बीर

औचक सुनी मुरलिया बाजी
मेरो मनुआ है गयो राजी
सुध बुध मेरी उत ही भाजी

लोक लाज की कौन सुने, मेरो जियरा धरे न धीर

एक तो चन्द्र उजेरी छाई
सोय रहे सब लोग लुगार्ई
ऐसी रैन सलौनी आई

ऐसे में को घर बैठे, मैं भाजूं मेरी बीर

कहा करैंगी पार परोसिन
ये तो जनम-जनम की बैरिन
प्रीति की रीति न जानै गवारिन

नन्दनन्दन ते बिना मिले मेरो पजरयो जाय सरीर

जाय मिली वह नन्दनन्दन सों
तन सों मन सों रोम रोम सों
जैसे बिछुरी मीन नीर सों

लोक वेद की कठिन शृंखला तोड़ें गोपी बीर

बरसावे सुन लई घोर गिरिवर पै बंसी बाज रही॥

ऊँची ऊँची बनी अटारी
सोय रही सुख सों ब्रजनारी

नींद खुली बरजोर, गिरिवर पै बंसी...।

बंसी की धुनि लागी कानन
चौक परी सुन मीठी तानन

ये मनुआ लीयो चोर, गिरिवर पै बंसी...।

भूल गई गुरु जन की लाजें
बंसी सुन सुन गोपी भाजें

सब बन्धन को तोर, गिरिवर पै बंसी...।

चंदा की है चटक उजारी
फूलन की शोभा है न्यारी

नाचें ब्रज में मोर, गिरिवर पै बंसी...।

बंसी सुन बंसीधर पाये
रास विलास किये मन भाये

देखें हैंस नैनन कोर, गिरिवर पै बंसी...॥

-----O-----

अरि मोपे सुन-सुन रहो न जाई,

ये वंशी श्याम बजाई ॥

साँझ समय चौका के भीतर बैठ रे सोई कर रही में,
वंशी सुन लकड़ी भई आली आँच बुझी और भज चली में,
देखूँ बाहर दीख्यो जा नें गोपी सबई रिझाई।
कांधे लकुट कामरी कारी गाय चराय घर आवत है,
चारों ओर घेर रही गऊँ बीच बीच छवि पावत है,
कारी कारी और धुंधरासी लटुरी मुख पै छाई।
गोरज छाय रही सब अंगन तिरछो मुकुट विराजत है,
तिरछी रेख लगी कजरा की तिरछो ही मुसकावत है,
तिरछी चाल देख मो तिरछो तिरछी सैन चलाई।
बन ते आवनि मधु मुसकावनि नैन नचावनि मन मोहै,
सैनन ही सब बात भई संकेत देत अँखियाँ सोहैं,
कदम फूल तै हाथन में कदमन की ठौर बताई।

-----O-----

तू बंशी नोक बजौयो रे, बंशी के बजवैया।

तेरे कारन वन को धाई
घर ते पानी के मिस आई
संग नाय ननदी को लाई
कोई मीठो गीत सुनैयो रे, ओ जसुदा के छैया।

यमुना लहर लहर लहराई
कदमन की छाया मन भाई
फूल सुगंध रही है छाई
तू भंवरा सो मंडरैयो रे, माखन के चुरवैया।
तेरी चितवन भई कटारी
तिरछी तिरछी औगुनगारी
बिना मोल बिक जावै नारी
तू यारी तनक निभैयो रे नैनन में मुसकैया ॥

-----O-----

परलै पर गई बंशी चारे नें बजाय दई बंसिया ॥
घर के सब सोये हैं तै तै अपनी खटिया,
में ही इकली जागुं करवट तै-तै तकिया।

बंशी चुभी कटारी जैसी मेरे बीच जिया,
मर गई मैं तो श्याम विरह में रटती पिया-पिया।
कैसे जाऊं कैसे पाऊं अपना मन बसिया,
कैसे श्याम अंक में लागूं भुजभर कसिया।।

-----O-----

बाज रही आधी रात बंसी बाज रही।।
वन के हिरना वन में कूदें तै तै हिरनी साथ
बंसी सुन चौकड़ी भूल सब ठाड़े नाये माथ
हिरनी मोह रही, बाज रही आधी रात..।
खिला पिघल गई परवत की सुन के बंसी की तान
झरना फूट बहे धरती से झर-झर ताल बंधान
धरती मोह रही, बाज रही आधी रात..।
खिल गये कमल रात में ऐसी बाजी बंसी वीर
चंदा श्रम गयो बंशी सुनके श्रम गयो यमुना नीर
यमुना मोह रही, बाज रही आधी रात..।
बंशी सुन बादर धिर आये छांह करें हरि ऊपर
धीमें गरज के ताल लगावै फूलन बरसें झर झर
बदरी मोह रही, बाज रही आधी रात..।।

मेरी मुंह लगी मुरली री,
कोई तै गई चुराय, कोई तै गई चुराय।।

मुरली ते मैं गाय चराऊं
जब जंह चाहूं गाय बुलाऊं
वन तै जाऊं घर बगदाऊं
कौन जुलम मोपे कर गई री, कोई तै गई..।

मुरली ते मैं रास रचाऊं
ब्रज गोपिन को घर ते बुलाऊं
जैसे चाहूं वैसे नचाऊं
कैसे धोखे दै गई री, कोई तै गई चुराय..।

मुरली है प्रानन ते प्यारी
मुरली बिना चैन मोहे नां री
नाम परयो मेरो मुरली धारी
भारी गजबहिं डाय गई री, कोई तै गई..।।

-----O-----

हो कांढा प्यारे सुन्या दे बंरुनिया।।
बंशी कारन घर ते निकसीं
हो कांढा रे मैं यमुना किनरिया।
पनियां को मैं पनघट आई
हो कांढा रे सिर धरे गगरिया।

भाजी-भाजी आई न कोई देखे
हो कान्हा रे टेढ़ी गोकुल नगरिया।
तोय देख मेरे बिछुवा बाजें
हो कान्हा रे मेरी उड़ रही चुनरिया।
अब ताई तोय इकलो न पाई
हो कान्हा रे इकले में संवरिया॥

-----O-----

बाजी मीठी-मीठी बंसी बाजी रे रसिया
बंसी के बजोया॥

मीठी बंसी बाजी भोर भुरहरे
जागी जागत ही भाजी रे रसिया, बंसी के..
मीठी बंसी बाजी पीरी फाटे
धार काढ़त ते भाजी रे रसिया, बंसी के..
मीठी बंसी बाजी सूरज उगे
पनियां को मैं भाजी रे रसिया, बंसी के..
मीठी बंसी बाजी जेय रही मैं
जेवत ते उठ भाजी रे रसिया, बंसी के..
मीठी बंसी बाजी पति संग सोई
पलका तज के भाजी रे रसिया, बंशी के..॥

महारास

धेलें महारास वृन्दावन राधा प्यारी औ बन्दावाल।
शरद मास की पूरणमासी

सब जीवन को है सुखरासी
लतन में फूल खिले भारी
झूम रही धरती पे न्यारी
सबै ऋतु छाई हैं प्यारी

ब्रह्म-सुन्दर जल औ वायु है सुन्दर है आकाश,
सुन्दर धरती सोहनी सुन्दर चन्द्र प्रकाश।
रास खेलवे को मन करकै वंशी लई गुपाल॥

मुरली मधुर बजाई गिरिधर

तीनों लोकन में फैल्यो स्वर

सुनत ही मोह गयीं ब्रजनार
भूल गई सुधि बुधि नाहि सम्हार
चलीं सब छोड़ जगत व्यवहार

ब्रह्मकछु गोपी रोकीं गई, जान न पावै रास,
तन तज पहुँची सबन ते पहले नित्य विलास।

बंधन तोर चलीं मतवारी नाय लाज कौ ख्याल ।
उलटी चाल चलें ब्रजनारी

भूल चतुरता भई गमारी
होठ पै काजर दियो लगाय
गाल पै बंदी को चिपकाय
धुंधरु हाथन में लटकाय
दह-घर घर ते सब निकस के गयीं जहाँ बलबीर
कल्पवृक्ष के निकट बहै निर्मल जमुना नीर ।
आओ आओ ब्रजगोपी हंस बोले मोहनलाल ।
कैसे तुम सब वन को आई

रात भयानक नाहि डराई
बड़े घर की हो तुम सब नारि
रात में आई कहा विचारि
हैंसेंगे लोग दैय सब गारि
दह-युवतिन को यह धर्म है मानें पति कौ देव,
भजें पराये पुरुष कौ कुलटनि की यह टेव ।
वन की शोभा देख चुकीं अब जाओ घर यहि काल ।।

कपट भरी हरि की यह बानी

सुन-सुन कै गोपी कुम्हिलानी
लगी रोवन दुख में ब्रजवाम
बही धारा असुवन उर धाम
कही विनती सुनिये घनश्याम

दह तुम तजि और न जान ही तुम जीवन तुम प्रान,
तुम पति मति गति एक ही तुम मर्यादा कान ।
कृष्ण बिना मर्याद धर्म सब लोक वेद जंजाल ।।
धन्य धन्य बोले हरि नागर

दृढ़ है तुम्हरी प्रेम उजागर
चलो अब खेलें रास विहार
सम्हारे उलटे सब श्रृंगार
मांग मोती सिंदूर समहार
दह शीशा फूल पाटी कड़े बाजूबंद औ हार,
जेहरि नूपुर धुंधरु बिछुआ छल्लेदार ।
रूप अनेक बनायौ हरि तब गोपी भई निहाल ।।

इधर विहार कियो राधा हरि

फूल सिंगार कियो अंकन धरि

थकी जब प्यारी कह्यो पुकारि

तनक कांधे पै लेऊ बिठारि

लोप हरि भये छांड़ि सुकुमारि

दाहा श्रीराधा के विरह कूँ देख्यो सब ब्रजनारि

अपने-अपने प्रेम कौ गर्व दियो सब डारि

बहुत भांति रोई सुर सों तुम आओ दीनदयाल ॥

प्रगट भये वृन्दावन चन्दा

घोर लई सबने नंदनंद

लाल की शोभा देखें भाम

पकर पीताम्बर बोलीं बाम

निदुर तुम प्रेम न जानों श्याम

दाहा-बोले हरि या विरह सों, प्रीति बढ़ी नहिं थोर

तुम सबको ऋणियां भयो जनम जनम में घोर

खेलैं हिल-मिल रास सबई नाचैं दे दे सुरताल ॥

कोऊ तिरछे नैन मिलावैं

कमर हिलाय बदन मटकवैं

कौंधनी बाज रही सुर घोर

फिरत में फहरें साड़ी छोर

चूम मुख लेवें चित कूँ चोर

दाहा-दे गलबैया विहरहीं गावैं गीत रसाल,

ज्यों बादर संग बीजरी खेल रही थिर चाल

ककण माला हार फिरैं औ झुमकांगोरे गाल ॥

धन्य भई रस में ब्रजनारी

बहुविधि रास कियो गिरिधारी

किये जमुना में बहुतइ खेल

कमल फूलन की रेला पेल

सकैं को गाय श्याम की केल

दाहा-चार अरब उनीतीस कोटि लख चालीस असी हजार,

बरस ब्रह्म निशि सम निशा जानें न संसार ॥

महारास गावैं भव नासैं हियरा होय विशाल ॥